

Pressiteedüs 11. jaan 2010

Umalõ Pido om kirja pant 106 kuuri pia 2500 lauljaga

Seo aasta 29. mail Põlvan Indsikurmu lauluväljaku pääl tulõvalõ tõsõlõ võrokeelitse laulupidolõ Uma Pido om kirja pantu 106 kuuri 2488 lauljaga. No nakkas pääle kuurõ har'otamisõ aig pidos. Kuulda om viil mitmist pidolõtahtjist kuurõst, kõigil ildasjääjil pallõldas kõrraldajilõ helistä vai kirot!

Uma Pido projektijuht Triinu Ojar kõnõlõs, et kirja pantu kuurõ nummõr omgina sääne, nigu arvati: "Edimädsel pidol oll 2400 lauljat ja mi uutsõmigi sama pall'o vai veidü inämb huviliidsi".

Umma Pitto om tulõman 1137 segäkuuri-, 363 naisikoori-, 103 miihikoori- ja 885 latsi- vai mudilaisikoori lauljat. Laulukuurõ om tulõman kõgõ inämb Põlva (40), Võro (34) ja Tarto maakunnast (15), a näid om ka Valga (6), Harju (6), Rapla (2), Jõgõva (1) ja Lääne-Viru (1) maakunnast. Lätist tulõ Vana-Laitsna vai Veclaicene segäkuur, Soomõst eestläisi segäkuur Siller ja tulõman om ka Euruupa eestläisi kuur.

Kõrraldaja omma sändsest huvist võrokeelitse pido vasta väega rõõmsa. "Arvada omma "välisvõrokõsõ" härgütänü kuurõ, kon nä laulva, pitto tulõma ja tõsõlt puult jäi mi edimäne Uma Pido silmä rõõmuga mi esierälidse esihindäs olõmisõ üle," seletäs asja pido segäkuurõ üldjuht Ester Ratassepp. Viil om kuulda ka sändsist lauljist, kiä omma mujalõ elämä lännü, a pallõsõ hindäle noodi, opva laulu koton är ja tulõva mõnõ kohaligu kooriga kuun pidolõ.

Uma Pido miihkuurõ üldjuht Andres Määr ütles, et kuigina registriirmisega ildasjääjit kedägi tagasi ei aeta, sõs kõgõ inämb oodõtas viil perämädse minotini mano miihikuurõ: "Mehe tükise üks olõma sändse, et alostusõn ei saa vidämä, a loodami, et Uma Pido laulumiihi tulõ viil mano." Miihikuurõ laulõ pallõldas laulma ka pidolõ tulõvidõ segäkuurõ mehe.

Päält ärnimmatuisi kuurõ laulva pidol projektikoori "Naasõ nurmõst" ja "Mehe mõtsast", kon laulva nuu, kiä kongi koorin laula-i, a tahtva laulda õnnõ võrokeelitsel laulupidol. Viil om pido vidäjil plaan kutsu laulma ka "kunnakuurõ": pere-, sugu-, sõprus- vai kogokunnakuurõ, miä saava pidol laulda ütiskuurõ jaon ütehelülidse lauluga.

Uma Pido ei tulõ sõski õnnõ laulupido, samal pääväl om Põlvan pääväkava kontsõrtõ, laada ja tüütarriga. Päävä nagõl om sis õdagunõ pääkontsõrt Indsikurmun. Pido tegevä esierälidses umakeeline laul ja vana Võromaa katsa kihlkunna esierälidse olõmisõ vällätuuminõ. Umme juuri pääle mõtlõminõ hoit meid globalisiirmise tuulõn lindunõsõmisõ iist. Tuud kinnütäs ka pido moto, miä kõnõlõs meist ku puust – ku juurõ kimmähe maan ja tüvi tukõv, sõs vaa ka ladõv rõõmsahe tuulõn laulda!

Triinu Ojar
triinu.ojar@wi.werro.ee
tel 533 22 153
www.umapido.ee